

DATE: 09 / 09 / 2007

Ambil inisiatif sendiri tangani isu cuaca: PM

Negara anggota Apec mesti patuh protokol dipersetujui PBB

BH- 9/9/2007



DATUK Seri Abdullah Ahmad Badawi mahu negara Kerjasama Ekonomi Asia Pasifik (Apec) serius menangani masalah perubahan cuaca dengan mengambil inisiatif sendiri dan mematuhi protokol sedia ada yang sudah dipersetujui masyarakat antarabangsa di bawah naungan Pertubuhan Bangsa-Bangsa Bersatu (PBB).

Perdana Menteri berkata, anggota Apec yang terdiri daripada banyak negara kuasa besar dan perindustrian tidak boleh bersikap acuh tidak acuh kerana perubahan cuaca adalah masalah yang merentasi sempadan dan memberi kesan kepada semua negara di dunia.


“Jika Apec menunjukkan sikap serius mengenai perkara ini di sini...

menjadi harapan saya negara-negara ini juga menunjukkan sikap sama apabila menghadiri persidangan yang ada hubungan kait dengan perkara ini di tempat lain seperti persidangan yang akan diadakan di Bali tidak lama lagi.

“Di samping itu, apa juga protokol PBB yang sebelum ini sudah dipersetujui hendaklah dipatuhi,” katanya pada sidang media bersama wartawan Malaysia di sini, semalam.

Perdana Menteri menjelaskan kenyataannya pada perbincangan hari pertama Sidang Kemuncak Apec 2007 di Opera House, di sini, semalam yang turut dihadiri Presiden Amerika Syarikat, George W Bush; Presiden Russia, Vladimir Putin; Presiden China, Hu Jintao dan Perdana Menteri Australia, John Howard.

Cadangan Australia mewujudkan rangka kerja baru Apec berhubung perubahan cuaca yang menjadi agenda utama sidang kemuncak kali ini tidak disenangi banyak negara, ter-



APEC AUSTRALIA 2007

masuk Malaysia.

Malaysia menyifatkan langkah itu sebagai retorik kerana masyarakat dunia sudah mewujudkan pelan tindakan di bawah PBB dan Protokol Kyoto yang tidak dimeterai Australia dan Amerika.

Abdullah berkata, beliau juga menyatakan kepada pemimpin Apec bahawa semua negara di dunia ini perlu

mengambil satu pendirian iaitu berusaha mengurangkan pelepasan ‘gas rumah hijau’ supaya suhu dunia tidak terus meningkat dan menyebabkan pelbagai kemusnahan alam sekitar.

Abdullah berkata, pemimpin Apec juga bersetuju supaya rundingan Pusingan Doha yang tertangguh sekian lama dimulakan semula dan diselesaikan.

Katanya, kegagalan mencapai persetujuan dalam rundingan di bawah Pertubuhan Perdagangan Dunia (WTO) itu akan merugikan negara membangun kerana banyak perkara berkaitan perdagangan tidak dapat dibincangkan atau diselesaikan.

Terdahulu, Abdullah mengadakan pertemuan dua hala dengan Presiden Mexico, Felipe Calderon.

Perdana Menteri berkata, Malaysia dan Mexico bersetuju untuk mengadakan perjanjian berkaitan jaminan keselamatan pelabuhan dan rundingan mengenainya akan diadakan di Kuala Lumpur bulan depan.